

Ordre du jour

1. Dépôt d'un projet de loi
2. Débat d'orientation relatif à la Convention sur l'avenir de l'Europe
(*Discussion générale - Motion et Résolutions - Votes*)
3. Ordre du jour

Au banc du Gouvernement se trouvent: M. Jean-Claude Juncker, Premier Ministre, Ministre d'Etat; Mme Lydie Polfer, Vice-Premier Ministre; M. Henri Grethen, Ministre.

(Début de la séance publique à 14.31 heures)

M. le Président.- D'Sitzung ass op. Huet d'Regierung der Chamber iergendwellech Matdeelung ze maachen?

(Assentiment)

Den Här Minister Grethen huet d'Wuert fir den Dépôt vun engem Projet de loi.

1. Dépôt d'un projet de loi

M. Henri Grethen, *Ministre de l'Economie*.- Här President, ech sinn duerch groussherzoglechen Arrêté vum 5. Februar autoriséiert den Dépôt ze maache vum

- *Projet de loi 5099 instaurant un régime d'aide à la protection de l'environnement, à l'utilisation rationnelle de l'énergie et à la production d'énergie de sources renouvelables*.

M. le Président.- D'Chamber hält Akt vum Dépôt vun deem Projet de loi duerch den Här Wirtschaftsminister Henri Grethen. De Projet gëtt un déi zoustänneg Kommissioun weidergeleet.

2. Débat d'orientation relatif à la Convention sur l'avenir de l'Europe

Op eisem Ordre du jour vun haut de Mëtteg steet d'Orientéierungsdebatt iwwert den europäesche Konvent. Et hu sech bis elo age-droen: déi Häre Wiseler, Fayot, Helminger, Gibéryen, d'Madame Wagener, déi Hären Urbany, Calmes a Bausch. Als éischten ageschriwwene Riedner huet den Här Wiseler d'Wuert.

Discussion générale

M. Claude Wiseler (CSV).- Här President, Dir Dammen an Dir Hären, eis heiteg Debatt ass net déi éischt iwwert d'Europäesche Unioun an hir Zukunft. Et ass awer déi éischt, déi mer méi spezifesch dem Konvent widmen, deem Konvent deen duerch d'Erklärung vu Laeken dozou bestëmmt ass entscheedend Richtlinnen auszeschaffen, no deene sech d'Stats- a Regierungschefen ab Juni 2003 am Verlaf vun der nächster Regierungskonferenz kënnen a sollen orientéieren.

Dee Konvent ass de konkreten Ausdrock vum Wëlle vum Europäesche Rot fir an der Debatt iwwert déi eigentlech Finalitéit an déi zukünfteg Organisatiouns- a Funktionsweis vun der Unioun nei Weeër ze beschreiben. An him sinn déi europäesch Acteure vertrue-den, deenen hir Zoustëmmung gebraucht gëtt, wann Europa sech e grondleeënden neie politeschen Zouschnëtt gëtt. Verrieder vun de Regierungschefe vum Europaparlament a vun deenen nationale Parlamenten, sou wéi vun der Kommissioun, beroden zesummen en europäesche Verfassungsvertrag, deen als eenheetlecht konstitutiivt Dokument vum politeschen Europa soll déi aktuell Vertragslandschaft ersetzen.

Originell un där Démarche vum Konvent ass net nëmme seng institutionell verschiddenaarteg Zesummesetzung, mä och déi geographesch. Et ass fir d'éischt an

der Geschicht vun der Unioun, dass d'Bäitrëtskandidaten un esou enger Aarbecht gläichberechtegt associéiert sinn, an zwar alleguer. Och d'Türkei hält als dräizéngte Kandidat fir en EU-Bäitrëtt um Konvent deel.

Wann dëst Gremium am Ufank och nach vu verschiddene Skeptiker als e quasi informellen Diskussionsforum ugesi ginn ass, deem seng Zesummesetzung eleng wuel kéint dofir suergen, dass net schrecklech vill bei sengen Debatte géif erauskommen, sou huet de Konvent zënter senger Asetzung viru ronn engem Joer awer, muss ee ganz kloer soen, eng Eegendynamik entwéckelt, déi drop hin deit, dass säin Ofschlossbericht duerchaus kéint méi si wéi e Rapport un den Europäesche Conseil, Rapport mat deem dësen dann eppes ufänkt oder och net.

Am Verlaf vun der Zäit huet d'Zesummesetzung vum Konvent och geännert. Haut sëtzen als Regierungsvertreider esou vill Aussen-an Europaministeren op de Konventsbanke, dass et legitim ass unzuhuelen, hei géif d'Aarbecht vun der nächster CIG wirklech präfiguréiert ginn. Däitschland, Frankräich, d'Belsch an d'Türkei hunn hir Ausseministeren delegéiert, Italien säi stellvertredende Premier, Groussbritannien säin Europaminister. Dëst muss als Zeechen derfir gewäert ginn, dass de Konvent vum rengen Berodungs- zu engem halwe Beschlussorgan évoluéiert huet. Dëst bedeit och, dass dat Resultat, op dat de Konvent hischafft, nämlech d'Redaktioun vun engem am Konsens zustan kommende Verfassungsvertrag, wuel kann erreecht ginn. Mir sollten eis Debatt vun haut am Hibleck vun esou engem Dokument féieren.

De Konvent huet elo bal e Joer zënter senger konstituierender Sëtzung den 1. März 2002 getaagt. Am Verlaf vun där Zäit huet e quasi all Mount zwou Plenartagungen ofgehalen an zéng Aarbechtsgruppen hu sech mat jeeweils engem fundamentale Reformsujet befaasst, éier se en Ofschlossrapport vun hire Berodunge virgeluecht hunn. Dës Aarbechtsgruppen hunn all wichteg Themegebiddere a Politikberäicher am Zesammenhang mat der Unioun ofgedeckt. Vun der Subsidiaritéit an der Vereinfachung vun de Rechtsinstrumenter iwwert d'Aussen- an d'Verdeegungspolitik bis hin zum sozialen Europa leie Berichter vun den Aarbechtsgruppe vum Konvent vir. Elo geet et drëms, aus dëse Berichter Schlussfolgerungen ze zéien, déi sech fir d'Redaktioun vun engem eenheetleche Verfassungstext eegnen. De Konvent ass souze-soen a senger waarmer Phas ukomm.

De Conseil vu Laeken ass dovun ausgegangen, dass déi wesentlechste Aufgab vum Konvent géif dra bestoen - an en huet seng Deklaratioun och dorop axéiert -, de Bierger en neit, e méi kloert, e méi immediat Europabild ze vermëttelen, andeems e Propositione géif maache wéi een d'Unioun gläichzäiteg géif vereinfachen an dem Bierger se méi no bréngen. E kruziale Schrëtt op deem Wee, dat ass zu Laeken festgehalen ginn, ass den Iwwergang vun enger komplizierter Landschaft vun dräi grondlegende Verträge zu engem eenze-

ge Grënnungsdokument, wat wiesenschaft eng Verfassung misst sinn, och wann iwwert dëse Begrëff nach net déi allergréissten Eenegkeet herrscht.

De Wee zur europäescher Verfassung ass eigentlech e logeschen an e virgezechneten. Eng „union sans cesse plus étroite“ tëscht Staaten an hire Bierger, sou wéi de Vertrag vu Maastricht se postuliert, kann op Dauer nëmme vun engem Instrument vum interne Recht begrënn an organiséiert ginn. Dofir ass den Iwwergang vum Vertrag, engem Instrument aus dem Völkerrecht, zu der Konstitution als intern Rechtsnorm, déi juristesche Iwwersetzung vun där Aspiratioun zu enger nach méi enger politescher Unioun op eise Kontinent ze kommen.

Dësen Iwwergang bedeit ganz sécher e qualitative Schrëtt, deem seng Bedeitung net ze ënnerschätzen ass. An de Grënnere joren huet kaum een dru geduecht déi Gemeinschaften, déi do konstituéiert goufen, op enger anerer Basis wéi op där vu Statenzesummeschlëss ze fondéieren. Deemools ware mer nach wäit ewech vun enger Konzeption, déi wëllt dass net nëmme déi europäesch Staaten, mä och déi europäesch Bierger noutwendeg Légitimitéits- a Legitimationsquelle sinn, an dass also d'Unioun op enger dualer Basis muss funktionéieren.

Virun allem dësem Ëmstand gëtt mat der Redaktioun a mat der Akraaftsetzung vun enger europäescher Verfassung Rechnung gedroen. Europäesch Bierger kënnen keng international Verträge mateneen ofschléissen. Dat maache just hir Staaten, an et ass domat och just d'Verhale vun de Staaten, vun deenen aktuelle 15 Memberstate vun der Unioun, wat an nennenswäertem Mooss vun dem Vertrag geregelt ass, an net d'Verhale vun de Bierger. Mat deem Iwwergang an eng Verfassungsgemeinschaft gëtt dat e wéineg anescht.

Dësen Text stellt domat, a mengen Aen, dee signifikantste Change-ment an der Bedeitung vun der Europäescher Unioun zënter de rëmesche Verträge duer. Natierlech gouf et no 1954 wichteg Momenter mam Acte unique 1985, mam Vertrag vu Maastricht 1991, mä dës Instrumenter hunn d'Wiese vun der Gemeinschaft, respektiv der Unioun net verännert. Et blouf eng Statengemeinschaft. Déi Verfassungsgemeinschaft, op déi mer eis zou bewegen, beréiert awer d'Wiese vun der Unioun. Si gëtt zu enger Staaten- a Völkergemeinschaft, déi net méi ausschliesselech um Wëlle vun de State berout, mä och op deem vun den europäesche Bierger.

Ee Wuert nach an deem Zesammenhang zur Begrëfsdefinition. Wat e Verfassungsvertrag ass, an dat schéngt jo den Term ze sinn op dee sech einstweile festgeluecht gouf, fir dat Dokument, wat am Entstoen ass, ze beschreiwen, dat ass schonn an dëser Etapp schwéier ze soen. Verfassungsvertrag sinn onbekannte Wiesen an der juristescher Welt, mä am Kader vun där sui generis Konstruktioun, déi d'Europäesch Unioun ass, muss et och erlaabt sinn, mat sui generis Begrëffer ze operéieren. Wann d'Vetragsnotioun nach un deem Konstitutionellen drun hänkt an dat d'Saach vereinfacht, soll een aus enger terminologescher Debatt kee Glawenskrich maachen. Eent ass awer wichteg, ob mer elo vun enger Verfassung einfach esou oder vun engem Verfassungsvertrag schwätzen, d'Bedeitung vum Akt ass ganz genee déiselwecht. Déi eng an déi aner bereeden de Wee an déi dual Légitimitéit, an allen zwee stelle se den Iwwergang

zu enger vun enger interner iewegter Rechtsnorm geregelter Unioun vu Staaten a Völker duer.

Fir dat Ganzt emol un engem konkreten Beispill festzemaachen: D'Verfassung vun de Vereenegte Staaten vun Amerika fänkt u mat der Formel: „We, the people.“ Déi europäesch Verträge hunn, obwuel dat net do stong, mä just e Sous-entendu war, ugefaangen op der Basis vun engem: „We, the States.“ Mä nodeems en europäesche Verfassungsvertrag mam duebele Wëlle vun de Staaten an den Europäer um Wee vu Referenden a Kraaft gesat ginn ass, baséiert déi politesch Unioun vun Europa um Konzept vun „We, the States and the people.“

Här President, grad well den Iwwergang an d'Verfassungsgemeinschaft esou ee bedeitende Schrëtt ass, muss en op enger Iwwerluegte Manéier vollzu ginn. Et gëtt wiesenschaft ënnerscheeder tëscht engem Vertrag an enger Verfassung, an och wa mer begrëfflech déi zwou Notiounen mateneen fusionéieren, da gëllen dach verschidde Regeln, déi mer musse mateneen an Aklang bréngen. Am Entwurf vun deenen éischte 16 Artikel vum zukünftigen Verfassungsvertrag, deen de Presidium vum Konvent d'lescht Woch virgeluecht huet, si sécherlech an dësem Kontext nach eng ganz Rei Froen op.

E Verfassungsdeel soll en Dokument sinn, dat nëmme déi wesentlech Mierkmoler vun deem politesche Gebilde, dat se organiséiert, regelt an dem Sekundärrecht den Detail iwwerléisst. De Vertraglechen Deel soll e Kompendium vun Detailprovisiounen sinn. Dës zwou Konzeptionen sinn net wiesenschaft Famill mateneen. Wa mer se wëllen an engem eenzege Dokument mateneen vereenen, muss mer nawell dat Konstitutionell vun deem Vertraglechen trennen.

Et ass kloer, dass de Verfassungsvertrag muss op där enger Säit dat Grondleeënd regelen an zum Ausdrock bréngen, wat d'Wiese vun der Unioun ass. E muss Wäerter an Iwwerzeugungen ausdrécken op denen d'Unioun baséiert, an e muss duerleeën zu wéi enge gemeinsamen Usichten a Virgoensweisen d'Memberstaaten an d'Bierger vun der Unioun sech entschloss hunn. Op der anerer Säit, well e jo d'Verträge, déi mer haut kennen, soll ersetzen, muss hien d'Politike vun der Unioun definéieren, an dat kann net mat manner Detail a manner Déifgang sinn, wéi et de Moment de Fall ass. Also ass et evident, dass an deem konstitutionellen Deel vum Verfassungsvertrag aner Regele gëlle wéi an där vertraglecher Partie.

Gutt ass, dass e puer vun deene wichtige Froen, déi an der Erklärung vu Laeken opgeworf goufen a fir déi vill Memberstaaten a Bierger sech interesséieren, schonn an enger éischter Redaktionsetapp vum Konvent ugepaakt goufen. Et sinn dës virun allem d'Grondlage vun der Unioun an d'Kompetenzverdeelung tëscht hir an de Memberstaaten. Déi institutionell Froen, sou wollten et och d'Stats- an d'Regierungschefen, ginn zu engem spéideren Zeitpunkt am Detail behandelt, dann nämlich wann déi Politiken an Inhalter definéiert sinn, deenen d'Institutionen am Fong just nëmme sollen dëngen.

De Presidium vum Konvent huet d'lescht Woch 16 Artikel virgeluecht déi konstitutioneller Natur sinn. Verschiddener vun den Dispositionen, déi de Leadership vum Konvent do redigéiert huet, droen, a mengen Aen, awer Elementer vu politescher Programmatik a sech, wou ee sech d'Fro muss stellen, ob se an dee konstitutionellen Deel gehéieren. Déi juristesche Qualitéit a Verbindlechkeet vun den Dispositionen, déi de Presi-

dium redigéiert huet, stellen eng Rei Froen. Den éischten Artikel ass fir dës Constat a sech sënnbildlech. Ech wëll deen eng Kéier zitéieren, well en a sech symbolesch ass. Do gëtt gesot: „Inspirée par la volonté des peuples et des Etats d'Europe de bâtir leur avenir commun, cette Constitution établit une Union, au sein de laquelle les politiques des Etats membres sont coordonnées, et qui gère, sur le mode fédéral, certaines compétences communes.“

Dass also innerhalb vun der Unioun sënngemeiss all d'Politike vun de Memberstate koordinéiert ginn, ass esou gesot, mengen ech, net ganz richtig. Och den Ausdrock „sur le mode fédéral“ seet nëischt Konkretes aus. A wat eng „politique commune“ ass, steet op jidde Fall net an de 16 Artikelen, déi eis elo virleien. Schliesselech ass den Ausdrock „certaines“ ganz sécher een, deen nëischt zur Präzisioun vum Verfassungstext bäidréit. Leschtendlech mengen ech, dass d'Verben „coordonner et gérer“ an dësem Kontext relativ schwach Ausdréck si fir dat auszudrécken, wat mer a sech wëlle soen. Et feelt sécherlech, zumindest an deem éischten Artikel, mä och an enger Rei anerer déi duerno kommen, un där grousser Envolée, un deem groussen Idealismus, deen awer zu engem Deel noutwendeg ass fir d'Kreatioun vun deem, wat mer an deenen nächste Jore wëlle maachen.

Ech wëll a kann op dëser Plaz elo keng Analys vun där éischter Version vun all deene 16 Artikel maachen. Ech mengen awer, dass déi Version, esou wéi se elo hei läit, nach sécherlech ganz staark muss verbessert ginn. Dat war jo och esou geduecht, well d'Konventionar, oder wéi nenne mer se, d'Conventionnés op franséisch, si gebieden hir Amendementer esou schnell wéi méiglech eran ze reechen. Ech ginn dovun aus, dass der och eng ganz Rei schonn elo wäerte kommen. E ganz décke Pak. Ech weess awer och wéi schwéier et fir se ass, Amendementer an dëser Etapp zu engem Text ze bréngen, wou a sech 16 Artikel virleien an de Rescht vun den Artikelen a sech net do ass, well ee jo net weess, andeem een déi 16 éischt Artikel kennt, wat an deenen nächsten Artikel wäert déi global Konzeption vum Text sinn, an et esou evidenteweis extrem schwéier ass déi éischt Partie emol ze amendéieren, wann een net weess, wat an där zweeter an an där drëtter iwwerhaapt am Detail wäert stoe kommen. Mä ech denken awer, dass et wichteg ass, dass d'Reaktiounen zu dëse Propositionen direkt elo kommen, well soss risikéiere mer, dass deen Dampfer op sengem falsche Kurs nach een Aisberg ze pake kritt.

Dem Konvent seng Aarbechte si bis elo erstaunlech positiv verlaf an ech trauen him absolut zou, eng gutt Virlag auszeschaffen, mä nach muss op den éischte Wurf vu sengem Leadership elo reagéiert ginn.

Ee Problem, deen ech am Zesammenhang mam Verfassungsvertrag nach speziell wëll belichten, ass dee vun der Agliederung vun der Charta vun de Grondrechter. Dës Charta ass de Moment an zënter dem Sommet vun Nice eng Absichtserklärung ouni Verbindlechkeet. Si ass net Deel vun der Vertragslandschaft, awer mam Iwwergang an d'Verfassungsgemeinschaft soll se elo verbindlech ginn a wéi all modern Verfassungen een Titel zu de biergerleche Fräiheeten a Rechter beinhalten.

Zwee Problemer stelle sech hei. Den éischten ass dee vun der Charta hirer Lokalisatioun am Verfassungsvertrag. Deen zweeten ass d'Aklobarkeit vun hiren Dispositionen, an domat verbonnen d'Interaktioun vun der Europäescher Cour zu Lëtzebuerg an dem Gerichtshaff fir Mënscherechter zu